


[www.BibleForChildren.org](http://www.BibleForChildren.org)


# Aepa Gemae 1




Akeya'vilagamo aepa  
fai'niya afina'mo Goti'a  
koku'na'e mopa'e'mo  
afa yateti'mo alo  
hu'niye.



Hu'niya'monanafa mopa'age'mo  
hanege koku'na'age'mo hanege  
hu'nigeno magoke ya'mo alagi  
ohane'niya'mofe'mo  
kanale osu'niye. Muki  
haopalegamo alopa  
ani'mo hane'nigeno  
hani hu'niye. Goti  
Auneme'amo'mo ani  
alopa anite'mo  
halelinuneno huno  
haku aige aige huno  
mai'niye.




Mai'nigeno'ae'mo Goti'a, aeka halo, huno nehigeno aeno ha le'niye. Goti'a ha neleya kavafe'mo felugae, huno agi ateteno hani hu kavafe'mo hani'ilagae, huno agi ateteno hu'niye. Hani huteno ko ti'nigeno'ae'mo napa vani afina'mo afole ai'niye.



Goti'a ina ge huno hu'niye. Folagapi ya'mo'a ani'mo  
alino fako hugiye. Goti'a folagapi ya'mo agi'amo  
koku'nane, huno agi ate'niye. Hani huteno ko  
ti'nigeno'ae'mo napa tu afina'mo afole ai'niye.



Napa tu afina'mo hano hutegeno Goti'a huno'ae'mo,  
Koku'na'mo afe'alumelaga hane'niya anife'mo uka  
mago haopalega alika anupa hugeno'ao mopamo hau  
hino, huno hu'nigeno ani'mo uno mago haopalegamo  
hane'nigeno mopamo afole ai'niye. Ani'mo hau hu'niya  
haopalegae'mo Goti'a agi'amo mopae, huno ate'niye.




Inagi ani'mo uno alino anupa hu'niya  
haopalega'ae'mo, solovala anine, huno agi ate'niye.  
Goti'a afole ai'niya kava'mo ageteno'ae'mo,  
Kanale hu'niye, huno hu'niye.



Huteno Goti'a huno'ae'mo, Mopamo'mo kahaumo alino  
afole aige ne'ya'mo'a avina ya'mo hanesiya ne'ya'mo  
afole aige yosamo'mo alagamo  
aesigeno ani alagafi'mo  
avina'amo afole aige  
hugiye, huno hu'niye.




Hu'nigeno ani ya'amo ago afole ai'niye.  
Hani huteno ko ti'nigeno'ae'mo napa tali afina'mo  
afole ai'niye.




Goti'a lole alopa ha le yatala'mo alo hu'niye. Alopa ha le ya'mo'a felugamo yagaisigeno aise ha le ya'mo'a hani'ilagamo yagaisiyafe'mo alo hu'niye. Goti'a ani kava huno kanefi'e'mo alo hu'niye. Hani huteno ko ti'nigeno'ae'mo napa fo afina'mo afole ai'niye.



Huteno Goti'a huno'ae'mo,  
Solovala anipi'mo alu ya alu  
ya'mo afa'a maisaya ya'mo  
mai'a havaitegae, huno  
hu'niye. Inagi nama  
anaga'mo koku'nate'mo  
afole aite'a halelitata  
hugae, huno hu'niye.  
Hani huteno ko  
ti'nigeno'ae'mo napa faefu  
afina'mo afole ai'niye.




Goti'a huno'ae'mo, Mopamo'mo afa'a maisaya ya'mo  
alu ya alu ya'mo alino afole aino apategaiye. Ani  
ya'mo yuna afugi nagalo'yavegi afela afugi huno alino  
afole aino apategaiye, huno hu'nige'a afole ai'nae.



Huteno Goti'a huno'ae'mo, lagaemo vaya'mo  
lagaitigana huta alo higetao. Apakaemo solovala anipi  
noyamele'mo yagaige koku'nate namale'mo yagaige  
yuna afugi yagagafagi afela afugi muki ma mopafi  
yatenagi hu'a yagaige hugae,  
huno hu'niye. Huteno Goti'a  
muki alo hu'niya ya'ae'mo  
ageteno'ae'mo alagi alagepa  
ya'age'mo hane'niye, huno  
age'niye. Hani huteno ko  
ti'nigeno'ae'mo napa  
sikisi afina'mo afole  
ai'niye.




Inagi Ala kava ne'mo Goti'a ani alo hu'niya  
vekamo'mo yagaisiyafe'mo Ineni kotega hane'niya  
hoyale'mo avaleno ate'niye.



Goti'a ha paino'ae'mo,  
kagaemo muki mani  
hoyafi'mo hane'niya  
yosa alaga'amo afa'a  
negane.

Negana'monanafa  
alagepa kava'e hosu  
kava'e'mo alino apave  
lisige'a afite'a agesaya  
yosa alagamo ma  
hane'niyanagi o'no. Nesana  
afina'mo ago alagi faligane,  
huno ha pai'niye.



Huno huteno Goti'a mopamo aliteno yagagafagi muki  
alu afu alu afugi namagi huno alo hu'niye. Goti'a ani  
vekamo'mo apaki'apimo apatesiyafe'mo muki ya'amo  
apavalelino e'niye. Inagi ani vekamo'mo  
muki ya'ae'mo magoke magoke huno  
apaki apateteno nama anaga'e'mo  
apaki apate'niye.



Agaemo muki yuna yafe'mo apaki apatege muki afela  
yafe'mo apaki apatege muki nama anagafe'mo  
apakimo apatege hu'niye. Ani vekamo'mo haiya agufa  
apakimo apate'nifi ani apaki'apige'mo  
alagi hane'niye. Hane'niya'monanafa  
ani ya'afati'mo Atamu'e'mo mago  
afalu'amo ya'mo huno mai'nenon ha  
maesiya vekamo o'mai'niye.




Inagi Ala kava ne'mo Goti'a ve kanomo  
havaesiyafe'mo alino havaeno ate'nigeno alagi au  
kaleno alagi hu'niye. Au kale'nigeno'ae'mo Goti'a ve  
kanomo haipa ayamufamo aliteno ani  
kate'mo maleno akanino  
ate'niye. Inagi Ala kava  
ne'mo Goti'a ani  
ayamufaleti'mo a kanomo  
alo huteno ve  
kanolegamo  
avalelino e'niye.



Hu'niya'mofe'mo ani kava'mo afole  
aisiyafe'mo ve kanomo'mo  
ita'afo'ala'moganimo anataleno uno  
a'a'e'mo ali'ana lokaesa'ageno'ae'mo  
magoke anakufamo hamalegaiye.



Goti'a  
ma mopafi  
vaya'aife'mo lusi  
kava huno hau ayamopafi'mo  
au'niya'mofe'mo ani aiya magoke  
mafa'ne'amo avaleno apami'niye. Ina  
lagimo mafa'ne'ae'mo apakesamo  
afi'a fatago nehisafige'a alagi  
ofali'a alagepa hu'a maige  
maige hu'a maisayafe'mo  
avaleno  
apami'niye.



### Lomu 3:23

Na kava hu'nageno'aene. Muki vaya'mogimo hosu kava'mo hute'a Goti ha le konali ya'amo u'a hai'a me tale'naya'mofe'mo no'aliye.

### Lomu 6:23

Na kava'mo nehageno'aene. Hosu kava'mo ali'ya'amo ne'aliya vaya'ai miya'apimo falisaya kava'mo hane'niya'monanafa Goti'a fikumo hapa maeno ne'apamiya kava'mo alagepa hu'a maige maige hu'a maisaya kava'mo hane'niye. Agaemo Ala kava netimo Yesu Kalaisipi'mo ne'maiya vaya'mo ne'apamiye.

### Himulu 9:27

Goti'a huno'ae'mo, muki vaya'mo magoke afina'mo falitesage'na agoti hu'na apategauve, huno hu male'niye.



Efasasi 2:8,9 Goti'a fikumo lapa maeno lapamiteno'ae'mo lapakesamo afita fatago hu'naya kavateti'mo lapakufamo alino katino lapate'niye. Lapakaitapimo lapakesamo afita fatago osu'nafa Goti'a fikumo lapa maeno lapami'nigetapa lapakesamo afita fatago hu'nae. Goti'a vaya'mogimo apaki'apile'mo ali'a asaga osisayafe'mo alagepa kava'apileti'mo apakufamo alino katino no'apate.

Lomu 10:9,10 Kagaemo hukae'mo, Goti'a Yesu'mo fali'niyateti'mo ago alino he tino ate'niye, huka kaipafi'mo kagesamo afika fatago hutekae'mo, Yesu'a Ala kava netimo mai'niye, huka kavayafati'mo aeka hakalo nehisanana Goti'a kagufamo alino katino kategaiye, huta lapa nepaune. Ani kavatefe'mo apaipafi'mo apakesamo afi'a fatago nehageno'ae'mo Goti'a huno'ae'mo, naulagale'mo fatago vaya'mo mai'nae, huno nehiye. Ani kava'mo huno Goti'a apagufamo alino katino apatesiyafe'mo apavayafati'mo ae'a hakalo hugae.



Yoni 3:16,17

Goti'a ma mopafi vaya'aife'mo lusi kava huno hau  
ayamopafi'mo hau'niya'mofe'mo ani aiya magoke  
mafa'ne'amo avaleno apami'niye. Ina lagimo  
mafa'ne'ae'mo apakesamo afi'a fatago nehisafige'a alagi  
ofali'a alagepa hu'a maige maige hu'a maisayafe'mo  
avaleno apami'niye. Goti'a ma mopafi vaya'mo agoti huno  
apateteno'ae'mo, hosu kava'mo hu'nae, huno hisiyafe'mo  
mafa'ne'amo alino ate'nigeno emi'no'me'nifa apakufamo  
alino katino apateteno hapau vaisiyafe'mo alino  
ate'nigeno emine'niye.



## 1 Yoni 5:11-13

Goti'a ageteno ha maeno faigoko gemo aeno hakalo huno'ae'mo, nagaemo maige maige hutapa ne'maiya ya'mo lapami'nove, huno laha pai'niye. Ani maige maige hu'a ne'maiya ya'mo mafa'ne'afi'mo mai'niye.

Goti Mafa'ne'amo avale'a apaipafi'mo ate'naya vaya'mo maige maige hu'a ne'maiya ya'mo ago ali'nae. Goti Mafa'ne'amo avale'a apaipafi'mo o'ate'nisaya vaya'mo maige maige hu'a ne'maiya ya'mo o'ali'nae.

Nagaemo mani gemo Goti Mafa'ne'amo agi'alefe'mo lapakesamo afita fatago nehaya vaya'mogita hutapae'mo, maige maige huta maisuna ya'mo ali'none, hutapa afitetapa agesayafe'mo mani gemo avo'mo kae'nove. Lapakaemo afitetapa lapakesamo afita fatago hume hume visayafe'mo avo'mo kae'nove.



# Aepa Gemae 1-2

Storyline by: Edward D. Hughes

Illustrated by: Byron Unger, Lazarus,  
and Alastair Paterson

Adapted by: Bob Davies, Tammy S.

Keyagana Bible (kyg) © 2013, Wycliffe Bible  
Translators, Inc. All rights reserved.

<https://www.bible.com/bible/1105/GEN.1.KYG2013>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

